

gunstigen vnd lieben hern patronen vnd mechtigen forderern zcu eigen handen, vnd abwesens seiner tugentsamen hausfrawen.

Darüber stehen, mit roter Tinte geschrieben, wohl von Melanchthons Hand die Worte: *εἰρων* theologorum quorundam, darunter mit derselben Tinte von derselben Hand: Scilicet egregia vocatio, cum tu te vocandum obtendis. Breviter: Coldicius est Coldicius. *ἀεὶ ψεύδης*.

Gots gnad vnd fried vnd was ich durch ihnen guts vermag in dienst allzeit zuuor. Erbarer vnd namhafftiger, in bsonder gunstiger vnd lieber her patron vnd grosser forderer. Aws gancz trewer vnd guter Zcuersicht gib ich euch zcuerkennen, das vorm iaer zcu zzeit meines ehlichen beilagers mein gnedigster her churfurst in eigener person, vnd mittlerweile durch den alten canzler, doctor Brücken, mich gnediglich vertröstet habn mit dinsten zcuersorgen.

Vnd nachdem ich damhals meher genaigt war, wie ich auch noch itzo bin, zcu weltlichn dinstn mich gebrauchen lassen, so habens doch sein c. f. g. vor besser geachtet, das ich mich des predigambts halten solt, dazcu dan sein c. f. g. gnediglich fordern vnd helffen wolten.

Dieweil ich dan eine solche lange zzeit mit beschwerung darauff gewartet, als der ich nichts habe vbir die blosse thumerey zcu Aldenburg, welche vbir LX fl. einkommens nicht hat, vnd nuh dieselb zcusamt meines liben weibs geringen guterlein fast mit der helfft als mit XXX fl. verschaczen vnd verstewern mus, vnd also vnmöglich ist mich, mein weib, kind vnd gesindt in diser tewern zzeit mit der vbirmasse zcuerhalten, zcu dem das mir in hertzog Georgen lande vmbs euangelions willen alles das meine gwaltiglich genommen ist, welchs doch niemand bedencken wil, so werd ich bericht, wie sein c. f. g. einen hoffprediger anzcunhemen gedencken, als es dan wol die hohe not vnd fast ein schimpf ist sein c. f. g., als obirsten patronen des euangelions, one einen aygnen prediger zcu sein.

Wue nuh disem also vnd ich ie predign soll, wie es dan sein c. f. g. habn wollen, vnd ich dazcu tuchtig geachtet wurd, wie ich mich dan von mir selbs, wie sichs auch nicht gbört, dazcu nicht dringen will, so halt ich mich eben als meher zcum haubt als zcun fussen vnd wil mich czu gots lob vnd ere dazcu zcufordern vor einem frömbden euch beuholln haben.

Vnd ob vvilleicht mein gnedigster her solchs ein abschewen ahn mir habn mochten, nachdem ich, wie ich gewislich weis, seinen c. f. g. felschlich angegeben bin, als solt ich hertzog Georgen in meinem predigen geheuchelt vnd die warhait verschwigen haben, so sol es das werck, ob got will, anders weisen, nemlich das ich itzo zcwue sermones an hertzog Georgen im druck zcu Wittemberg hab vnd, wie mich doctor Martinus berichtet, inwendig XIII tagen gewislich ausgehen werden, wie ich sie dan meinem gnedigstn hrn dem churfursten vnd euch zcuschicken wil, daraus man sich der warhait zcuerkunden hat, was ich an hertzog Georgen hoff gepredigt.

So las ich mich beduncken, ich hab mich aws gots gnadn in der schrift auch also vmbgesehen vbir das, das ich nuh eine alte hoffiunckfraw bin, das ich vor andern wissen solt, wie man euch hoffische reiten sol.

Im fall abir, das dys nicht gescheen mag, wie es dan der satan vnd meine verfolgere nicht gern zculassen werden, vnd ich selbs aus vieln vrsachn genaigtet bin zcu weltlichn dinsten, nachdem ich mit weib vnd kind bfallen, so werd ich aus gemeinem gerucht bericht, wie das amt zcu Leisneck, so itzo allein mit einem schosser bestellt